

---

## PIERRE DE BARJAC.

---

TOT francamen, donna, venh denan vos  
Penre comjat per tos temps a lezer;  
E grans merces, quar anc denhetz voler  
Qu'ieu mi tengues per vostr' amor plus guai,  
Tan quan vos plac; mas aras, pus no us plai,  
Es ben razos que, si voletz aver  
Drut d'otra part que us puesca mais valer,  
Ieu 'l vos autrey; ja pueis no us en volrai,  
Ans n'aurem pueis bon solas entre nos,  
Et estarem cum si anc res no fos.

Et a la fin totz temps serai clamos  
Del vostr' afar, qu'aisso 'n vuelh retener  
Qu'ieu non lo puec gitar a non chaler;  
Enans sapchatz tos temps vos servirai,  
Fòrs que jamais vostres drutz no serai,  
Si be m devetz encaras lo jazer  
Que m promezetz quan n'auriatz lezer;  
E non o dic mas `quar ieu soing non ai,  
Ans s'ieu n'agues estat tan poderos,  
Tal hora vi qu'en fora plus joyos.

Mas vos cuiatz qu'en sia aziros,  
Qu'aisi del tot non vos o dic de ver,

Mas derenant vos o farai parer ;  
Qu' ieu ai chاوزit en lieys cuy amarai ,  
E vos avetz chاوزit , qu' ieu ben o sai ,  
En un tal drut que us fara dechazer ,  
Et ieu en tal que vol pretz mantener ,  
En cui jovens s' apropcha e de vos vai ;  
Sitot non es de luec tan paratjos ,  
Ilh es sivals plus belha e plus pros.

E si 'l jurars e 'l plevirs de nos dos  
Pot al partir de l' amor dan tener ,  
Anem nos en en las mans d' un prever ,  
E solvetz mi et ieu vos solverai ;  
E pueis poirem quascus d' aqui en lai  
Plus leyalmen autr' amor mantener ;  
E s' anc vos fis re que us deya doler  
Perdonas mi , qu' ieu vos perdonarai  
Tot francamen ; qu' estiers non er ja bos ,  
Si de bon cor non es faitz lo perdos.

Mala donna , tro que m fezest gelos  
Non fezi ren mas al vostre plazer ;  
Mas anc gelos non ac sen ni saber ,  
Ni ren non sap gelos que s ditz ni s fai ,  
Ni hom non sap los mals que gelos trai ,  
Ni patz non a gelos mati ni ser ,  
Ni en nulh loc gelos non pot caber ,  
Per que vos deu plazer quar m' en partrai :

Qu'assatz val mais a sellui qu'es lebro  
Que ges, sivals tug non son enueyos.

Fe que m devetz, si be us sui aziros,  
Prendetz comjat de mi qu'ieu 'l pren de vos.